

直隸霍州志目錄

卷首

圖

州屬總圖

州境

霍山

州城

學宮

卷一

沿革

卷二

星野

卷三

疆域

里甲附

卷四

山川

卷五

城池

卷六

官署

卷七

驛站

舖遞附

卷八 關隘 營汛附

卷九 水利 津梁附

卷十 物產

卷十 倉儲

卷十 賦役 榷稅鹽法附

卷十 學校 書院義社學附

卷十 祠廟

卷十 風俗

卷十 機祥

卷十 古蹟 陵墓寺觀附

卷十一 封爵

卷十二 秩官

卷十三 宦績

卷十四 科目 恩拔副歲例貢附

卷十五 仕籍 援例封典附

卷十六 人物 賢哲 宦業 寓賢

卷十七 列女 貞節 賢媛 篤行 文苑 方技 仙釋 誠早婚說附

卷十八 藝文 上中下三冊 舊志原敘附

目錄

直隸霍州志卷十三

學校

古有學而無廟四時祭先師曰釋奠士初入學者祭先師曰釋菜皆於學漢以後京師立廟唐貞觀四年詔州縣學皆作孔子廟於是學附於廟五季之亂學廢而廟存宋慶厯中詔天下立學自是廟與學總名曰學而人才由之愈盛

國朝廟祀之典視前代爲極隆士之遊於庠序者靡不肅然有所觀感興起於其間而咸知夫學者所以

學爲聖賢之意由是兢兢焉致力於學以求其所
以本之於身而達之於天下國家庶無負

聖代興賢育才之盛典也乎

霍州儒學

學在州治西南元至元二年學久廢知縣韓奭卜於舊
址西北地廣三十舉武其表倍差功未竣知縣賈琪
繼成之段成已記大德七年地震圯知縣李伯淵營
講堂夾室廟垣十年監州失刺不花建殿宇學舍延
祐七年知縣范渥治兩廡至治二年知縣白賁繕完

之臧洪記明洪武三年霍邑省入州設立學校規制
益備二十七年明倫堂燬三十年同知馬士能修備
殿廡門垣堂齋廚庫宣德七年學正曹端重修明倫
堂建頌書閣自爲記成化宏治間知州張玘州判周
盛嘉靖三年知州宇文鏞三十四年知州杜學易先
後增修三十六年知州褚相重修劉煦記四十二年
知州李春崇禎間知州丁時學重修自爲記

國朝康熙二十年知州王雲鳳倡捐重修邑人黃翊聖
記三十九年知州李紹祖倡捐重修栢正記乾隆四

十八年知州單燾捐俸勸修至五十五年學正牛美璧始議興工五十九年工竣知州蔣榮昌記嘉慶二十三年知州顧紹先校官徐蔭績陳衍震倡捐修葺吏目胡鸞董其役

趙城縣儒學

學在縣治西明洪武七年縣丞凌文質建正統間知縣何子聰修萬厯間知縣張鎰張汝鉅郭峻繼修

國朝順治十六年知縣安錫祚倡修康熙四十四年知縣徐容修乾隆三年知縣蘇襄雲倡捐邑生續嘉謨

等勸輸興修教諭薛承祖記

靈石縣儒學

學在縣治西元大德十一年邑令韓敦武建明洪武十六年知縣李尚文修景泰間知縣范寧增修正德間寇燬知縣孫璫重修萬曆三年復圯於水知縣白夏大修之孔天孕記崇禎九年知縣趙一龍復修

國朝順治初知縣趙希普李廣生繼葺康熙八年訓導孫進修增修

謨訓

正泰卷三
順治九年

命禮部頒臥碑於天下學宮置明倫堂之左曉示生員
朝廷建立學校選取生員免其丁糧厚以廩膳設學院
學道學官以教之各衙門官以禮相待全要養成賢才
以供

朝廷之用諸生皆當上報

國恩下立人品所有教條開列於後

一生員之家父母賢智者子當受教父母愚魯或有
非爲者子既讀書明理當再三懇告使父母不陷於

危亡

一生員立志常學爲忠臣清官書史所載忠清事蹟
務須互相講究利國愛民之事更宜留心

一生員居心忠厚正直讀書方有實用出仕必作良
吏若心術邪刻讀書必無成就爲官必取禍患行害
人之事者往往自殺其身常宜思省

一生員不可干求官長交結勢要希圖進身若果心
善德全上天知之必加以福

一生員當愛身忍性凡有司官衙門不可輕入卽有

切己之事止許家人代告不許干與他人詞訟他人亦不許牽連生員作證

一爲學當尊敬先生若講說皆須誠心聽受如有未明從容再問毋妄行辨難爲師長者亦當盡心教訓勿致怠惰

一軍民一切利病不許生員上書陳言如有一言建白以違制論黜革治罪

一生員不許糾黨多人立盟結社把持官府武斷鄉閭所作文字不許妄行刊刻違者聽提調官治罪

康熙四十一年

欽頒訓飭士子文

國家建立學校原以興行教化作育人才典至渥也朕臨御以來隆重師儒加意庠序近復愼簡學使釐剔弊端務期風教修明賢才蔚起庶幾棧樸作人之意乃比年士習未端儒效罕著雖因內外臣工奉行未能盡善亦由爾諸生積錮已久猝難改易之故也茲特親製訓言再加警飭爾諸生其敬聽之從來學者先立品行次及文學學術事功源委有叙爾諸生幼聞庭訓長列宮

牆朝夕誦讀寧無講究必也躬修實踐砥礪廉隅敦孝
順以事親秉忠貞以立志窮經考業勿雜荒誕之談取
友親師悉化驕盈之氣文章歸於醇雅毋事浮華軌度
式於規繩最防蕩軼子衿佻達自昔所譏苟行止有虧
雖讀書何益若夫宅心弗淑行已多愆或蜚語流言脅
制官長或隱糧包訟出入公門或唆撥姦猾欺孤凌弱
或招呼朋類結社邀盟乃如之人名教不容鄉黨弗齒
縱倖脫褫扑濫竊章縫返之於衷寧無愧乎况夫鄉會
科名乃掄才大典關係尤鉅士子果有真才實學何患

困不逢年顧乃標榜虛名暗通聲氣夤緣詭遇罔顧身
家又或敗竄鄉貫希圖進取囂凌騰沸網利營私種種
弊端深可痛恨且夫士子出身之始尤貴以正若茲厥
初拜獻便已作奸犯科則異時敗檢踰閑何所不至又
安望其秉公持正爲國家宣猷樹績膺後先疏附之選
哉朕用嘉惠爾等故不禁反覆惓惓茲訓言頒到爾等
務共體朕心恪遵明訓一切痛加改省爭自濯磨積行
勤學以圖上進國家三年登造束帛弓旌不特爾身有
榮卽爾祖父亦增光寵矣逢時得志寧俟他求哉若仍

視爲具文玩愒勿傲毀方躍冶暴棄自甘是爾等冥頑
無知終不能率教也旣負栽培復干咎戾王章具在朕
亦不能爲爾等寬矣自茲以往內而直省鄉校凡學臣
師長皆有司鐸之責者並宜傳集諸生多方董勸以副
朕懷否則職業弗修咎亦難逭勿謂朕言之不預也爾
多士尚敬聽之哉

乾隆十年

欽頒訓飭士子文

士爲四民之首而太學者教化所先四方於是觀型焉

比者聚生徒而教育之董以師儒舉古人之成法規條亦既詳備矣獨是科名聲利之習深入人心積重難返士子所爲汲汲皇皇者惟是之求而未嘗有志於聖賢之道不知國家以經義取士使多士由聖賢之言體聖賢之心正欲使之爲聖賢之徒而豈沾沾焉文義之末哉朱子同安縣諭學者云學以爲己今之世父所以詔其子兄所以勉其弟師所以教其弟子弟子之所以學舍科舉之業則無爲也使古人之學止於如此則凡可以得志於科舉斯已爾所以孜孜焉愛日不倦以至於

死而後已者果何爲而然哉今之士惟不知此以爲苟足以應有司之求矣則無事於汲汲爲也是以至於惰遊而不知反終身不能有志於學而君子以爲非士之罪也使教素明於上而學素講於下則士固將有以用其力而豈有不勉之患哉諸君苟能致思於科舉之外而知古人之所以爲學則將有欲罷不能者矣觀朱子此言洵古今通患夫爲已二字乃入聖之門知爲已則所讀之書一一有益於身心而日用事物之間存養省察闡然自修世俗之紛華靡麗無足動念何患詞章聲